

KHUTBAH JUMAAT

“MERAIH GANJARAN 27 KALI GANDA”
(03 Februari 2023M/ 12 Rejab 1444H)

الْحَمْدُ لِلَّهِ، الْحَمْدُ لِلَّهِ الْغَنِيِّ الْحَمِيدِ، وَأَشْهَدُ أَنْ لَا إِلَهَ إِلَّا اللَّهُ
وَحْدَهُ لَا شَرِيكَ لَهُ ، وَأَشْهَدُ أَنَّ سَيِّدَنَا مُحَمَّدًا عَبْدُهُ وَرَسُولُهُ.
اللَّهُمَّ صَلِّ عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ وَسَلِّمْ تَسْلِيمًا كَثِيرًا.
أَمَّا بَعْدُ، فَيَا عِبَادَ اللَّهِ، اتَّقُوا اللَّهَ حَقَّ تُقَاتِهِ وَلَا تَمُوتُنَّ إِلَّا وَأَنْتُمْ
مُسْلِمُونَ.

Kaum muslimin yang dirahmati Allah,

Marilah kita bersama-sama meningkatkan ketaqwaan kepada Allah *subhanahu wata'ala* dengan menunaikan segala perintah-Nya dan meninggalkan segala larangan-Nya. Semoga kita beroleh kejayaan, kebahagiaan dan keselamatan di dunia dan di akhirat. Khatib mengingatkan para jemaah agar memberi sepenuh perhatian kepada khutbah yang akan disampaikan dan tidak melakukan perkara-perkara yang *lagha* (sia-sia) seperti berbual-bual atau menggunakan telefon. Marilah kita bersama-sama mendengar dan menghayati khutbah yang bertajuk : **“Meraih Ganjaran 27 Kali Ganda”**.

Kaum muslimin yang dirahmati Allah,

Ibadah solat fardu merupakan salah satu Rukun Islam yang mesti dilaksanakan oleh setiap orang Islam yang mukallaf iaitu individu yang sihat akalnya dan telah mencapai umur baligh. Solat memiliki

kedudukan dan keistimewaan yang sangat besar dalam Islam sehingga diumpamakan sebagai tiang agama. Terlalu banyak kelebihan dan faedah yang disebut bagi orang yang menjaga solat. Antaranya, solat dapat mencegah seseorang daripada melakukan perkara-perkara yang keji dan mungkar. Selain itu, solat dapat menggugurkan dosa seseorang selagi dia tidak melakukan dosa besar. Malah, solat yang dilaksanakan itu akan menjadi cahaya pada hari kiamat. Sayyidina Abdullah bin Amru *radiallahu anhuma* meriwayatkan bahawa Rasulullah *sallallahu alaihi wasallam* bersabda:

((مَنْ حَافِظٌ عَلَيْهَا كَانَتْ لَهُ نُورًا وَبُرْهَانًا وَنَجَاةٌ يَوْمَ الْقِيَامَةِ، وَمَنْ لَمْ يُحَافِظْ عَلَيْهَا لَمْ يَكُنْ لَهُ نُورٌ وَلَا بُرْهَانٌ وَلَا نَجَاةٌ، وَكَانَ يَوْمَ الْقِيَامَةِ مَعَ قَارُونَ وَفِرْعَوْنَ وَهَامَانَ وَأُبَيِّ بْنِ خَلْفٍ))

Maksudnya: Sesiapa yang menjaga solat lima waktu, maka solat itu akan menjadi cahaya, bukti dan keselamatan baginya pada hari kiamat. Dan sesiapa yang tidak menjaganya, maka dia tidak mendapatkan cahaya, bukti, dan juga tidak mendapat keselamatan. Dan pada hari kiamat, orang yang tidak menjaga solatnya itu akan bersama Qarun, Fir'aun, Haman, dan Ubay bin Khalaf.

(Hadis riwayat Imam Ahmad)

Kaum muslimin yang dirahmati Allah,

Rasulullah *sallallahu alaihi wasallam* amat mengambil berat pelaksanaan solat fardu dilakukan secara berjemaah di masjid. Seheinggakan baginda amat marah jika mendapati ada dalam

kalangan umatnya yang lelaki tidak hadir ke masjid untuk solat berjemaah. Daripada Abu Hurairah *radiallahu anhu* bahawa Rasulullah *sallallahu alaihi wasallam* telah bersabda :

((لَقَدْ هَمَمْتُ أَنْ أَمُرَ بِالصَّلَاةِ فَتُقَامَ، ثُمَّ أُخَالِفَ إِلَى مَنَازِلِ قَوْمٍ لَا يَشْهَدُونَ الصَّلَاةَ، فَأُحَرِّقَ عَلَيْهِمْ))

Maksudnya: *Sungguh aku bertekad supaya solat didirikan kemudian aku akan pergi kepada setiap rumah seseorang yang tidak hadir solat berjemaah lalu akan aku perintahkan agar dibakar rumah mereka.*

(Hadis riwayat Imam al-Bukhari)

Rasulullah *sallallahu alaihi wasallam* sendiri tidak pernah meninggalkan solat fardu secara berjemaah di masjid. Malah, ketika sakit sekalipun, baginda *sallallahu alaihi wasallam* tetap berusaha menghadirkan diri untuk berjemaah walau terpaksa dipapah. Inilah yang perlu kita contohi dari teladan agung kita.

Rasulullah *sallallahu alaihi wasallam* memberi penekanan yang serius terhadap solat berjemaah kerana kepentingan dan manfaat daripadanya sangat besar. Imam al-Bukhari *rahimahullah* meriwayatkan hadis daripada Ibnu Umar *radiallahu anhuma* bahawa Rasulullah *sallallahu alaihi wasallam* bersabda:

((صَلَاةُ الْجَمَاعَةِ تَفْضُلُ صَلَاةِ الْفَذِّ بِسَبْعٍ وَعِشْرِينَ دَرَجَةً))

Maksudnya: *Solat berjemaah itu lebih utama 27 (dua puluh tujuh) kali ganda darjat daripada solat secara sendirian.*

Selain itu, Rasulullah *sallallahu alaihi wasallam* juga memberi jaminan kepada orang yang ikhlas mendirikan solat secara berjemaah di masjid bahawa mereka akan terselamat daripada api neraka dan sifat munafik. Sayyidina Anas *radiallahu anhu* meriwayatkan bahawa Rasulullah *sallallahu alaihi wasallam* bersabda:

((مَنْ صَلَّى لِلَّهِ أَرْبَعِينَ يَوْمًا فِي جَمَاعَةٍ يُدْرِكُ التَّكْبِيرَةَ الْأُولَى كُتِبَتْ لَهُ
بَرَاءَتَانِ بَرَاءَةٌ مِنَ النَّارِ وَبَرَاءَةٌ مِنَ النِّفَاقِ))

Maksudnya: Sesiapa solat berjemaah dengan ikhlas kerana Allah selama 40 hari dengan mendapat takbir pertama (takbiratul ihram), maka dia dibebaskan dari dua perkara: dibebaskan dari neraka dan dibebaskan dari kemunafikan.

(Hadis riwayat Imam at-Tirmizi)

Kaum muslimin yang dirahmati Allah,

Para bapa dan ibu berperanan besar mendidik dan mengasuh anak-anak mereka mendirikan solat sejak dari kecil dengan menunjukkan contoh teladan yang baik kepada anak-anak. Pengajaran dan penerapan ibadah solat mesti bermula dengan ibu bapa terlebih dahulu kerana anak-anak ini nanti sebenarnya akan menjadikan ibu bapa sebagai contoh utama mereka. Inilah juga perintah dari Rasulullah *sallallahu alaihi wasallam*:

((مُرُّوا أَوْلَادَكُمْ بِالصَّلَاةِ وَهُمْ أَبْنَاءُ سَبْعِ سِنِينَ، وَاضْرِبُوهُمْ عَلَيْهَا وَهُمْ
أَبْنَاءُ عَشْرِ، وَفَرِّقُوا بَيْنَهُمْ فِي الْمَضَاجِعِ))

Maksudnya: *Perintahkanlah anak-anak kamu untuk mendirikan solat ketika mereka berumur tujuh tahun dan pukullah mereka (jika mereka tidak mahu melaksanakannya) ketika mereka berumur sepuluh tahun dan pisahkanlah tempat tidur antara mereka.*

(Hadis riwayat Imam Abu Daud)

Kaum muslimin yang berbahagia,

Masjid-masjid kita sentiasa terbuka untuk kehadiran jemaah bagi menunaikan solat secara berjemaah. Justeru, gunakanlah kesempatan selagi hayat dikandung badan, sementara sihat sebelum datangnya sakit, untuk kita berusaha memenuhi masjid dengan memperkenakan perhiasan diri yang terbaik. Hayatilah hadis yang diriwayatkan oleh Abu Hurairah *radiallahu anhu* daripada Nabi *sallallahu alaihi wasallam* yang maksudnya:

((Sesungguhnya amal seseorang hamba yang pertama kali akan dihisab pada hari kiamat ialah solatnya. Apabila solatnya baik, dia akan mendapatkan kejayaan dan kebaikan. Apabila solatnya rosak, dia akan menyesal dan merugi. Jika ada yang kurang daripada (pelaksanaan) solat wajibnya, Allah Azza wa Jalla berkata: Lihatlah, apakah pada hamba tersebut memiliki amalan solat sunat? Maka solat sunat tersebut akan menampung kekurangan solat wajibnya. Begitu juga amalan lainnya seperti itu)).

(Hadis riwayat Imam at-Tirmizi)

Kaum muslimin yang dirahmati Allah,

Sebelum mengakhiri, marilah kita menghayati kesimpulan dari khutbah hari ini iaitu:

Pertama: Ibadah solat fardu merupakan Rukun Islam yang mesti dilaksanakan oleh setiap orang Islam yang mukallaf.

Kedua : Rasulullah *sallallahu alaihi wasallam* amat mengambil berat pelaksanaan solat fardu oleh kaum lelaki dilakukan secara berjemaah di masjid.

Ketiga : Bapa dan ibu berperanan besar mendidik dan mengasuh anak-anak mereka mendirikan solat sejak dari kecil dengan menunjukkan contoh teladan yang baik kepada anak-anak.

Mengakhiri khutbah, marilah kita bersama-sama menghayati firman Allah *subhanahu wata'ala* dalam surah al-Taubah, ayat 18:

أَعُوذُ بِاللَّهِ مِنَ الشَّيْطَانِ الرَّجِيمِ. بِسْمِ اللَّهِ الرَّحْمَنِ الرَّحِيمِ.
إِنَّمَا يَعْمُرُ مَسْجِدَ اللَّهِ مَنْ ءَامَنَ بِاللَّهِ وَالْيَوْمِ الْآخِرِ وَأَقَامَ الصَّلَاةَ وَءَاتَى
الزَّكَاةَ وَلَمْ يَخْشَ إِلَّا اللَّهَ فَعَسَىٰ أُولَٰئِكَ أَنْ يَكُونُوا مِنَ الْمُهْتَدِينَ ﴿١٨﴾

Maksudnya : *Hanyasanya yang layak memakmurkan (menghidupkan) masjid-masjid Allah itu ialah orang yang beriman kepada Allah dan hari akhirat serta mendirikan sembahyang dan menunaikan zakat dan tidak takut melainkan kepada Allah, (dengan adanya sifat-sifat yang tersebut) maka adalah diharapkan mereka menjadi dari golongan yang mendapat petunjuk.*

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ
الْآيَاتِ وَالذِّكْرِ الْحَكِيمِ، وَتَقَبَّلْ مِنِّي وَمِنْكُمْ تِلَاوَتَهُ، إِنَّهُ هُوَ السَّمِيعُ
الْعَلِيمُ. أَقُولُ قَوْلِي هَذَا، وَأَسْتَغْفِرُ اللَّهَ الْعَظِيمَ لِي وَلَكُمْ، وَلِسَائِرِ
الْمُسْلِمِينَ وَالْمُسْلِمَاتِ، وَالْمُؤْمِنِينَ وَالْمُؤْمِنَاتِ، فَاسْتَغْفِرُوهُ إِنَّهُ هُوَ
الْغَفُورُ الرَّحِيمُ.

الْحَمْدُ لِلَّهِ. الْحَمْدُ لِلَّهِ حَمْدًا كَثِيرًا كَمَا أَمَرَ. أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدُهُ وَرَسُولُهُ. اللَّهُمَّ صَلِّ وَسَلِّمْ وَبَارِكْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ أَجْمَعِينَ. أَمَّا بَعْدُ، فَيَا عِبَادَ اللَّهِ، اتَّقُوا اللَّهَ حَقَّ تُقَاتِهِ لَعَلَّكُمْ تُفْلِحُونَ.

Kaum Muslimin yang dirahmati Allah,

Pada musim tengkujuh ini, mimbar menyeru agar kita sentiasa berwaspada dan mengikuti nasihat yang diberikan oleh pihak berkuasa dari masa ke masa sama ada yang berkaitan dengan kemungkinan banjir mahupun keadaan perairan untuk apa sahaja aktiviti. Pada masa yang sama, kita hendaklah sentiasa melakukan kawalan sendiri dengan sebaik-baiknya bagi mengelakkan terdedah kepada bahaya wabak penyakit. Teruskanlah memohon keampunan dan bermunajat kepada Allah *subhanahu wata'ala* agar diangkat segala wabak dan musibah daripada kita dan dikurniakan keselamatan dan kesejahteraan buat diri, keluarga, masyarakat, negeri dan negara.

قَالَ اللَّهُ تَعَالَى:

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا ﴿٥٦﴾

اَللّٰهُمَّ صَلِّ عَلَى سَيِّدِنَا مُحَمَّدٍ وَعَلَىٰ اٰلِ سَيِّدِنَا مُحَمَّدٍ، كَمَا صَلَّيْتَ
عَلَىٰ سَيِّدِنَا اِبْرَاهِيْمَ وَعَلَىٰ اٰلِ سَيِّدِنَا اِبْرَاهِيْمَ، وَبَارِكْ عَلَىٰ سَيِّدِنَا مُحَمَّدٍ
وَعَلَىٰ اٰلِ سَيِّدِنَا مُحَمَّدٍ، كَمَا بَارَكْتَ عَلَىٰ سَيِّدِنَا اِبْرَاهِيْمَ وَعَلَىٰ اٰلِ
سَيِّدِنَا اِبْرَاهِيْمَ، فِي الْعَالَمِيْنَ، اِنَّكَ حَمِيْدٌ مَّجِيْدٌ.

اَللّٰهُمَّ اغْفِرْ لِلْمُسْلِمِيْنَ وَالْمُسْلِمَاتِ وَالْمُؤْمِنِيْنَ وَالْمُؤْمِنَاتِ الْاَحْيَاءِ
مِنْهُمْ وَالْاَمْوَاتِ. اِنَّكَ سَمِيْعٌ قَرِيْبٌ مُّجِيْبُ الدَّعَوَاتِ يَا قَاضِيَ
الْحَاجَاتِ.

Ya Allah, ampunilah dosa-dosa dan kesalahan kami, ibubapa kami, ahli keluarga dan guru-guru kami. Limpahkanlah kesejahteraan, kedamaian dan kebahagiaan kepada kami semua dalam kehidupan di dunia dan di akhirat.

Ya Allah ! Ya Rahman ! Ya Rahim! Berikanlah taufiq dan hidayat-Mu kepada kami semua dan juga kepada pemimpin-pemimpin Negara kami, khasnya kepada Seri Paduka Baginda Yang di-Pertuan Agong Malaysia, dan juga pemimpin-pemimpin negeri kami, khususnya Tuan Yang Terutama Yang di-Pertua Negeri Sarawak.

Ya Allah! Kurniakanlah kami rezeki yang halal lagi diberkati, hindarilah kami dari sebarang bentuk gejala rasuah dan pelanggaran kepada peraturan dan undang-undang. Kurniakanlah

keselamatan dan kesejahteraan, jadikanlah kami ummah yang berkualiti dan berintegriti demi mencapai negara yang aman dan makmur serta mendapat perlindungan Allah *subhanahu wata'ala*.

Ya Allah, Ya Dzal Jalali Wal Ikram! Ya Allah, kukuhkanlah perpaduan dan kesatuan kami dalam aqidah, ibadah dan akhlak di bawah pegangan Ahli Sunnah Wal Jamaah. Limpahkanlah ke atas kami nikmat kesihatan dan keafiatan. Kurniakanlah kesembuhan kepada mereka yang diuji dengan penyakit-penyakit dan bebaskanlah negara kami daripada segala perkara yang tidak diingini dan wabak penyakit.

رَبَّنَا أْتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ. أَمِينَ،
أَمِينَ يَا رَبَّ الْعَالَمِينَ.

عِبَادَ اللَّهِ. إِنَّ اللَّهَ يَأْمُرُ بِالْعَدْلِ وَالْإِحْسَانِ. وَإِيتَاءِ ذِي الْقُرْبَىٰ وَيَنْهَىٰ
عَنِ الْفَحْشَاءِ وَالْمُنْكَرِ وَالْبَغْيِ. يَعِظُكُم لَعَلَّكُمْ تَذَكَّرُونَ. فَادْكُرُوا اللَّهَ
الْعَظِيمَ يَذْكُرْكُمْ. وَاشْكُرُوهُ عَلَىٰ نِعَمِهِ يَزِدْكُمْ. وَاسْأَلُوهُ مِنْ فَضْلِهِ يُعْطِيكُمْ.
وَلَذِكْرُ اللَّهِ أَكْبَرُ. وَاللَّهُ يَعْلَمُ مَا تَصْنَعُونَ. أَقِيمُوا الصَّلَاةَ.